













鐵網珊瑚書品卷三

吳郡朱存理性父集錄於欣賞齋

文正公道服帖一并跋

道服贊 并序

平海書記許兄製道服所以清其意而潔其身也

同年范仲淹請為贊云

道家者流 衣裳楚楚 君子服之 逍遙是與

虛白之室 可以居處 華胥之庭 可以步武

豈無青紫 寵為辱主 豈無狐貉 驕為禍府

重此如師 畏彼如虎 旌陽之孫 無忝於祖



希道比部借示文正詞筆觀之若侍其人之左右令人既喜而且凜然也熙寧壬子孟夏丙寅陵陽守居平雲閣題石室文同與可

東蜀文氏一印

獲觀文正公之詞翰淳重清勁如其為人每展卷誦誦未嘗不想見風采何名德之重使人愛慕如此其深也富川吳立禮題

隸古書

竊觀范文正道服贇文醇筆勁既美且箴以盡朋契之義有以見高陽公之德矣傳曰不知其人視其友諒哉熙寧壬子年十一月甲子吳興戴蒙正仲題魏文正公祥符八年進士也其為同年許比部作道



服贊辭莊義舒慙乎有德之言哉南北分合餘二百年而負幅疆理復混為一區公之孫曾嗣守先業不懈益恭得公書遺蘓才翁韓文公伯夷頌真迹而寶蓄之且摹刻於石今年至正元年益都宗人復自北携此贊併公侍祠像來南而歸之合浦之珠曲阜之履得於既失所以委重宗枋藩飾世緒者夫豈偶然之故有相之矣熙寧間文公與可題識云希道比部而不著其名宋登科記當自可考也卷中有東漢文尉祭酒家學印高陽及仙系小印皆緣許氏則是贊之為許氏物蓋已久矣不知何時而遂失之也耶作

贊時許公為平海掌書記耳熙寧始轉至比部其恬  
於進取如此於以見許公亦盛德之士不然公豈肯  
輕以清其意潔其身者而許之哉昔公書伯夷頌以  
遺才翁今復見公為希道謨書此贊則希道亦才翁  
第一人哉宋三百年文運休明泰治熙洽自景德祥  
符而始盛觀公此贊則公與許公之聯芳科甲信人  
才與時升降者為不誣矣元年冬十有一月二十七  
日東陽柳貫書

文正公為同年友許書記作道服贊言皆至理書特  
清勁至今觀之悚然增敬所謂寵為辱主驕為禍府

重此如師畏彼如虎是又美不忘規益可玩味乃知  
異時丞相堯夫布衾銘實權輿於此歟然是贊不載  
文正集中則公之文之遺者有矣抑亦盛年之作而  
或失於編次也耶因綴廿字以寓景行之意云文正  
道服贊忠宣布衾銘家乘揆一德名德符六經至正  
癸未春正月廿日金華胡助書

文正公與翰長帖 二并跋

仲淹再拜翰長學士伏惟起居萬福昨張去惑著作  
來捧真誨備荷勤意欲其委順保全不宜擇處也仲

淹非不思之寒儒之家世守廉素恐門戶一變有勃  
出勃入之禍况邊上乏人且勉於從事或稍寧息或  
得將師即有丘園之請以全苦節養生俟死此其志  
也俞旨一下鬼神來復久而無營知非他望明公諒  
之近以北事渴見賢者今聞彥國之好不復言之亦  
甚減憂未拜奉間惟見自重不宣仲淹拜上翰長學  
士座前 中秋日

答翰林學士帖不知為誰作也言近以北事謁見今  
聞彥國之好亦甚減憂蓋慶曆中鄭公再使契丹和  
好始定中國於是息兵垂五十年公之先憂後樂為

何如哉彥國鄭公字也所云邊上乏人且勉從事或  
稍寧息即有丘園之請則公為西帥時耳至恐門戶  
一變有勃出勃入之禍不惟公家子孫所當服膺而  
凡士大夫皆當寫置坐右以比盤杆几杖之戒者也  
至順四年夏六月晦東陽柳貫道傳識

文正公作此帖以復翰長學士雖莫詳其姓氏要是  
一達官無疑若張去惑著作則嘗游公門從事幕府  
公薨背時為淮南轉運使見於祭文可考也公之片  
言隻字流落人間者學士大夫咸以為法况其辭旨  
及於家國者乎嗚呼邊上乏人西北之憂後世卒不

免此又志士仁人之所為深慨者也元統二年春正月九日後學金華胡助敬題

慶曆間契丹乘中國有西警議入寇遂命富鄭公使虜卒定和議時文正公以西事知慶州此書與翰長所謂聞彥國之好亦甚減戩者即其時也書中又言有丘園之請以全苦節然其後與韓公並安撫御廷又除副樞密拜叅知政事以諂媚出使河東知邠州復知鄧而杭而青而賴丘園之請竟不獲遂其志而薨獨所謂全苦節者貫始終歷夷險而不渝也嗚呼大忠臯夔元功方召炳然大節照映今古又何其盛

哉至元四年後戊寅十有一月望日後學永嘉鄭僖  
敬題

文正公許下帖 三并跋

仲淹啓昨日至許下行次領真誨承動止無恙兼示  
及省榜兒子與李教授謝家弟兄王七俱過省親識  
中得失相半更三五日必見春榜也漸遠風音黯  
為戀惟多愛不宣仲淹上欽聖殿丞左右 三月十  
一日

今日相國筵會不暇子細保愛；或有書入京遞

中郎易達也

尺楮逾二百載魏公手筆如新語不繁而意足可以  
想見其人湯彌昌敬題

右文正公聞子弟過省答友人書若固有之視利達  
為何如哉與常人外飾遜避之辭中懷僥倖之意不  
可同日語覽者默識於辭意之表亦足以感發矣天  
台楊敬惠拜觀謹識時至順壬申人日

此行次許下答欽聖帖中云示及省榜兒子與謝家  
兄弟俱過省兒子即忠宣忠宣皇祐元年進士公以  
慶曆八年由鄧州求守杭明年三月十一日次許得



書正南省放進士時也欽聖不著姓今亦莫可考而  
籤題蔡欽聖必有據哉東陽後學柳貫書

祁留吳郡城中每從范靜翁先生閱其家藏文正公  
手帖凡若干卷今又得許下帖讀之富哉范氏之藏  
也靜翁先生力承宗緒至老彌篤凡遇其先公片紙  
隻字即購藏之以為家寶嗟乎公之翰墨留天地間  
如精金美玉人咸知愛重而况公之子孫：子哉是  
宜先生之寶之也使子孫之來者皆如先生之用心  
焉則公之遺澤將百世不泯矣蓋相與懋戒之至正  
十年歲在庚寅夏五月後學茶陵李祁謹題

文正公與師魯二帖 并跋

仲淹啓熱中得回問知漢東尤甚然西洛上京皆苦  
熱宣下開井救喝者此可知矣三兩日來因雨微涼  
彼亦然矣折支已差人許州般取到即走報不易  
請見錢者猶煎熬不足蓋日給外月有橫費處家  
家如之卯酒四瓶近寄來請收檢鄧醞已竭候新者  
送去合得花蛇散空心可日一服甚有功恐疑之和  
方寄上希多愛不宣仲淹上師魯舍人左右 七月  
十四日

新收舊識候到即有書去兼是棊侶也先託仲意  
仲淹頓首李寺丞行曾奉削遞中亦領來教承勤止  
休勝仲淹此中無事兒子病未得全愈亦漸退減田  
元均書來專送上近得揚州書甚問師魯亦已報他  
貧且安也暑中且得未動亦佳惟君子為能樂道正  
在此日矣加愛不宣仲淹 師魯舍人左右 四月  
二十七日

方范文正因與呂文靖爭論上前貶饒州時尹舍人  
實上書願得俱貶監郢州酒稅此一卷帖情義諄  
不啻兄弟蓋二公愛君憂國道合志同其相與之厚

自應爾耳淳熙乙巳清明日梁谿尤袤敬觀

師魯自均州興疾至南陽託范公以死蓋平日之相  
予者如此四明樓鑰書紹熙三年十月晦

范公二帖皆是師魯謫漢東時書後一帖却當在前  
或是自均過鄧託范公以死時問訊之書與衆云：  
之戒可見也賢者困厄至此人至于今傷之藏之深  
固之密石可朽名不滅歐公銘文盡之矣洪邁書  
佳客千山得：來主人雙眼為渠開逢人莫說當時  
事且泊南亭把一杯 右第二紙當是尹自均來訪  
范於南陽時也范戒尹以不須與衆云：此意最深

淳熙戊申三月廿八日廬陵楊萬里敬書

靜翁近又收得此二帖乃文正公與尹師魯書也交情古誼百世之下尚可想見視它帖尤當珍愛學士大夫所願見而不可得者况尤樓洪楊四公之題識亦豈復可得哉賢子孫永宜寶之至順四年五月五日後學東陽胡助謹書

景祐二年公上論遷都事與呂文靖異議黜知饒州祕書丞集賢校理余靖言加罪言者非太平之政坐落職監筠州酒稅而太子中允館閣校勘尹洙又言范某義兼師友乞從降黜亦坐貶崇信軍節度掌書

記監郢州酒稅此二帖皆尹公在郢時所遣問若曰  
日給外月：有橫費家：如之至於收檢卹酒候送  
鄧醞合花蛇散和方送上見朋友有救卹通財之義  
而惟君子樂道為能盡之也其後公鎮鄧尹公再貶  
監均州酒稅昇疾來鄧以存歿託公則公之於尹公  
可謂生死不易其諒矣然楊洪二公跋語以第二帖  
是自均來南陽時且有須與衆云：之戒今帖中  
乃無此語然以動止休嘉及報他貧且安也等言證  
之則非疾時矣恐此跋非此帖也前帖銜縫有王厚  
之順伯陰文十六字印知為順伯所藏順伯臨川王

和父之孫好古博物為中興第一徽文公與之友善  
集中載其書問可考也田元均諱况蓋謚宣簡云東  
陽後學柳貫謹識

尹公自謂與范公義兼師友而其言談罕及於性命  
至尹公處死生之變尤人所難及非知道者不足以  
與於此蓋是時風俗醇篤士大夫多不言而躬行未  
至立名字以相高此宋三百年極盛之際也伏觀范  
公遺帖安得不為之撫卷而三歎乎至正七年春正  
月甲子後學黃潛敬觀

范公與尹舍人往還書一卷當有與衆云：帖而逸

之觀洪楊二公跋語可知也後人不見此帖乃改跋  
中三字作三字耳覽者當能辨之元統乙亥春三月  
壬寅新安後學汪澤民謹書

范文正公以論事忤執政遂落職知饒州於時直范  
公者相屬於朝尹師魯亦自請同黜可以見一時賢  
才之盛矣師魯既貶監郢州稅觀魏公二書中語畧  
不及當時事亦不以師魯因已被黜而加存問蓋范  
公所論為國也而師魯之請以義也是豈有一毫私  
意於其間哉書末云惟君子為能樂道前賢之用心  
於此可見矣二帖筆力遒勁有晉人遺意尤非泛：



於書者范氏其世寶之至元三年後丁丑歲秋九月  
望後學泰不華書

景祐四年文正公既以言呂夷簡出知饒州尹公師  
魯亦貶監郢州酒稅慶曆四年尹為涇原經畧以爭  
城水洛事為董士廉所訟再貶均州監稅時文正公  
在政府也踰年公出知邠州又改鄧州此二帖蓋在  
鄧與尹者夫以尹公之賢文正公於其存也通以書  
而盡其慰問之誠歐陽公又於其歿也為之銘以致  
其痛惜之意好賢樂善固如此哉至元四年後戊寅  
十有一月望後學鄭僖書

宋盛時有西夏之擾范公與尹師魯合謀戮力以抗  
之相得甚深蓋以道義事功為友者也此二帖公與  
師魯者其一已刻文正尺牘中寬嘗閱之何幸今日  
復獲見此真跡哉然二帖不藏於尹氏顧歸於文正  
子孫則其後世之盛衰亦可知矣鄉後學吳寬謹書

歐陽文忠公詩帖一并跋

五言二十六韻奉酬子美離京後見寄之作

廬陵歐陽脩上

衆美子美貌堂：千人英我獨疑其胸浩：包滄溟

滄溟產龍蜃百怪不可名是以子美辭吐出人輒驚  
其於詩最豪奔放何縱橫衆懸排律呂金石次第鳴  
間以險絕句非時震雷霆兩耳不及掩百病為之醒  
語言既可駭筆墨尤其精少雖當力學老乃若天成  
濡毫弄點畫信手不自停端莊雜醜怪羣星見挽槍  
爛然溢紙幅視久無定形使我終老學得一已足矜  
而君兼衆美磊落猶自輕高冠出人上誰敢出其膺  
羣臣列丹陛幾位列公卿使之束帶立可以重朝廷  
况今參國議高論吐崢嶸惜哉三十五白髮今已生  
近者去江淮作詩寄離情口誦不及寫一日傳都城

退之序百物其鳴由不平天方苦君心欲使發其聲  
嗟我非鸞鷲徒思和嚶：因風幸數寄警我聲與盲  
趙子崧觀于廬陵凌波閣伯慈伯武伯起侍戊申歲  
中元日

右歐陽文忠公誦蘓子美五言二十六韻詩墨跡洪  
武間余在北京時於一戍卒家見遂索取之自念平  
生行湖海上有年前代名賢墨跡多見獨文忠公書  
不曾見焉今得此詩墨跡如獲夜光明月曷勝忻喜  
裝潢成卷秘于篋笥中已十五年矣嘗觀東坡居士  
文集有跋文忠公書云歐陽文忠公用尖筆乾墨作

方潤字神采秀拔膏潤無窮使後人觀之如見其清  
眉豐頰進趨燁如也今觀此詩墨跡方知東坡之言  
不虛矣此卷付與孫詒謹藏永為家寶永樂十一年  
秋七月廿二日逃虛老人書於京都崇禮坊之官廨  
太子少師榮國恭靖姚公嘗得歐陽文忠公誦蘓子  
美詩墨跡甚愛之自謂如獲夜光明月不勝欣喜遂  
書付孫詒公之子繼持以示予：觀文忠之詩稱道  
子美者以其氣之豪才之雄語之奇不牽世俗誠卓  
犖不羣之士也然子美在當時以酒食微過竟坐流  
落不偶而文忠他日序其文誌其墓深致意焉夫不

金齋玉瑤卷三  
三  
矜細行君子不能無惜於子美而文忠好賢育才之心見諸文辭者又拳：焉為當時諸君子惜也此詩之作子美未卒前七年於今三百七十餘年矣榮國書此已八年而遺世亦三年矣人生幾何歲月如馳撫卷惘然永樂十八年春二月己巳朝議大夫國子祭酒兼翰林侍講豫章章胡儼書

歐陽文忠公有宋名儒文章翰墨妙絕當世此詩乃公親筆以誦子美蘓公者遺落人間迄今餘三百年而為太子少師恭靖姚公所得詩固傑作無容言而其道勁溫潤尤可愛重恭靖公謂得之如獲夜光明

月不勝欣喜豈虛語哉付之孫詒永為家寶宜矣永  
樂庚子蒲節後四日資政大夫戶部尚書長沙夏原  
吉書

右歐陽文忠公答蘓子美詩真跡故太子少師姚公  
所藏寶之如拱璧自識其後云付孫詒余嘗以集本  
校之不同者五字子美文集作辭衆懸集作絃鶯集  
作鶯能助集仍舊作思和文與辭於義皆通懸及能  
助當從真跡而鶯則當從集本余素於少師公往還  
每造之必肅容坐壽椿堂焚香煮茗出清玩論文事  
繼以觴酌談笑為樂時詒生數歲拱手侍側溫然恭

敬能琅：誦讀也。余戲曰：公所持以老者在，此矣。公亦矜謂客曰：然。公沒，詒從其父宗善來北京。又三年，予至北京，詒亦長成鄉學。余見之，輒思公。又念公之不及見其長也。詒亦重大父之交游而勤：過予，忽不見數月。間過宗善，而詒則病瘖死兩月矣。余為之驚愕悼惜而怡張者累日。詒裁十有四歲，其資端厚，明秀宜不遽止。此先儒論稟氣清者不長，豈以是歟？宗善携此卷求予題。每語及詒，涕下潸然，悲不勝。因并及之。詒所可惜者，附少師公之後。永樂甲辰夏五月朔，廬陵楊士奇題。



余忝鄉里好嘗侍榮國茗飲之側公自負能書雖當  
世詹孟舉輩皆不入意獨好文忠公墨跡豈專在尖  
筆乾墨而已其文章政事固足使人景慕之者東坡  
所謂清眉豐頰進趨燁如若將見於字畫之間此言  
可與知者道然則世之工於書者可不師法文忠公  
之為人耶宣德元年燈節之暇行在翰林修撰張洪  
書

天平范氏先世諸卷

唐柱國誥一卷

將仕郎權知幽州良鄉縣主簿范隋

右可柱國

勅朝散大夫尚書水部郎中穆栖梧等渙汗鴻恩必  
乘其雷雨頌宣爵賞用振其簪纓以爾等列我盛朝  
累霑濡澤各有勞効許其叙錄行慶策勲於是乎在  
可依前件

咸通二年六月十一日

檢校司徒兼中書令使

中書侍郎兼工部尚書平章事臣杜審權宣奉

駕部郎中知制誥臣王鐸行

奉

勅如右牒到奉行

咸通二年六月十二日

檢校司徒兼侍中使

左僕射兼門下侍郎平章事 棕

給事中 中

告將仕郎前權知幽州良鄉縣主簿柱國范隋奉

勅如右符到奉行

主事吳亮

負外郎緘

令史楊鳴

書令使

咸通二年六月日下

右六世祖所受懿宗告也先世文書自經喪亂十亡八九此書獨存於三百年干戈之後子孫保之當何如耶紹興三年八月朔裝禡于廣州官舍右朝奉郎權發遣廣東路轉運判官正國謹書

積厚者流光積薄者流卑自然之理也范氏自唐咸通柱國起家至我宋紹興歲凡三百年本支六世文正忠宣二公繼世將相有功德於本朝所積厚矣流光雲來奕葉未艾後世宜有是似者厥惟懋哉新安

汪伯彥庭俊題於南粵之袞繡堂紹興三年九月一日

召嗣與觀

昔者知子能言其祖君子紀之近世譜學幾絕族系弗明重以兵革搶攘士大夫家能保其先世文書者尤鮮惟范氏世緒綿遠譜牒著明而子儀又能保其六世祖命書斯可尚也吳興章傑謹題

范氏之先唐則天時位宰相世系甚明咸通柱國蓋苗裔也文正公祖事錢氏以文章顯其後乃益暴燿於皇朝子儀忠宣季子承家濟美當復能光昭前人

金魚珠 卷三  
六  
紹興癸丑歲九月廿六日李璆謹題

范氏保姓受氏固遠矣然敦厚於春秋得文子士燮於國朝得文正忠宣焉文子嘗論鍾儀曰稱先職不背本也操土風不忘舊也不背本仁也不忘舊信也仁以接事信以守之雖大必濟惟文正忠宣儲慶羨祉奕葉顯美庭多魏絳之金石室富桓榮之車服今子儀郎中迺以尊祖之故保一主簿柱國之誥且惟恐子孫或墜逸之可謂不背本不忘舊得仁信之盡者况有問學以文之有名譽以崇之則踐世官修舊職蓋可拱而竣也異時芝房之詔閔以十襲其有觀

者抑必曰君臣之間乃爾耶紹興十五年乙丑五月初二日眉山程敦厚書

右子儀六世祖柱國告以其時考之檢校司徒兼中書令使者白敏中以是官為鳳翔節度使也左僕射兼門下侍郎平章事棕者杜相也以檢校司徒出使也崔鉉鎮襄陽令狐綯使中而幕侍中則未之考焉當俟博雅君子紹興己巳三月晦日賴川曾幾書

良鄉公之行事不見於史冊咸通中勲柱國而為主簿良鄉以其時考之懿宗之立唐室衰矣及文正公之遇慶曆忠宣之遇元祐勲烈名德蓋不出於偶然

者是以論其世也申呂稽中書

柱國公行事雖不見於史冊然至文正公忠宣公裁  
四世五世耳德業盛大闕閱光華為皇朝望族則祖  
風家範可想而知矣仰武盧奎書

安中蒙示以唐告元祐書帖臨路獲此奇觀適在海  
山展讀數過頓覺天池收波雲物改色其欣快可勝  
言哉固願各以數字自託門下而筆墨不精復因人  
事且壓以重名殆難措手只欲得<sub>下</sub>一等高紙四五幅  
携去前路納來也預媿不工耳安中再拜

晉范宣子叙其家世自虞夏商周迄晉之主盟保姓



受氏以為不朽而魯穆叔難之曰太上有立德其次  
有立功其次有立言是之謂不朽本朝范氏如文正  
忠宣盛德偉烈忠言嘉謨既卓然不可企及而傳系  
之遠又如此則二子所謂不朽者兼得之矣嗚呼盛  
哉紹興壬戌中元日揭陽劉昉謹題

漢唐時以用武功爵用散官用勳尚矣唐故事有宰  
相而階將仕郎今良鄉公雖主簿而勳乃柱國其踐  
歷也深矣惜夫史氏之闕文也紹興廿五年七月十  
八日吳興劉岑書

范氏以唐載初元年由春官尚書同鳳閣鸞臺平章

事未幾以直道與魏元同相繼以忠死謂宜有後至  
咸通初裔孫始以丞麗水知名於史此則未丞麗水  
時告也然名位不稱至本朝而後文正忠宣始相望  
而出焉時元臣傳曰公侯之子孫必復其始信矣哉  
給事中渢者王渢也檢校司徒兼侍中出使者幽州  
節度張允伸也豈侍郎曾公偶忘之歟隆興元年二  
月六日崇仁吳曾謹書

柱國公告史失其姓名治行無所稽考然四世之後  
有文正公五世之後有忠宣公積慶流澤可想見其  
人子儀郎中奉以周旋不敢失墜是能保其家者傳

之雲仍與王氏寶章較世系之遠近固無難也紹興  
丁卯仲春春東郡趙奇謹書

皇朝輔相如文正公忠宣公天下皆知尊仰今觀其  
上世唐咸通中柱國告又知其世德之遠也穀梁子  
云德厚者流光信矣夫紹興十八年正月二十五日  
左承議郎主管台州崇道觀許忻謹題

惟范氏遠有世序自唐柱國五世而至忠宣公可謂  
祿之大者今湖北漕使忠宣幼子也一日出示咸通  
柱國之誥則其保姓豈特守宗祊而已哉光輔累朝  
代為興家其祝史陳信於鬼神無媿辭矣紹興歲乙

丑月丙戌日丙辰鐵石翁宋瀚書

君子之澤盡於五世自柱國至文正公四世矣復生  
忠宣公世濟其美百世之後聞其風者皆足以興起  
今湖北運使忠宣公之季子善繼前修有祖風烈德  
澤之久不知何時而已耶宣子謂世祿為不朽穆叔  
告之以立言若聖宋之范氏其真不朽者歟紹興十  
六年三月望日高密周聿書

歐陽文忠公嘗作家譜序曰自唐末之亂士族亡其  
家譜今雖顯族名家多失其世次譜學由是廢絕因  
知干戈擾攘之際能保其譜系者鮮矣竊觀運使公

所收六世祖柱國誥命即唐懿宗朝所賜珍藏至今  
傳之子孫俾知世次且欲屬而不絕可謂知尊祖者  
矣歎服之次輒書卷末以贊盛美云時紹興十六年  
歲次丙寅正月六日潯陽馬居中謹題

靖康亂後人家圖籍亦一厄靡有子遺良鄉主簿命  
官牒唐咸通中所頒不知幾厄矣而能不失墜此范  
氏之佩筆算囊也如古鼎彝獻鬲宜永寶云申呂堅  
中謹觀

柱國時為鈞稽時勲已及此而行事無聞於傳記數  
世之後廼有文正公忠宣公為之子孫愚知柱國有

有隱德矣紹興辛酉中冬八日春國吳叔之謹題  
良鄉府君當唐之末世可以有為之時不辭小官蓋  
有以也文正公參預仁宗大政忠宣公兩相元祐致  
本朝盛治之極孔子曰邦無道富且貴焉恥也良鄉  
以之邦有道貧且賤焉恥也文正忠宣以之事雖殊  
而道寔同焉右朝奉大夫主管台州崇道觀賜緋魚  
袋趙戩謹跋

太守范公出示家藏唐咸通柱國告柱國四世孫即  
文正公也五世孫即忠宣公也二公碩大光明厥先  
以昌何修而克臻此豈非好是正直之效歟先都運

卽中文正之孫忠宣之子承六世令緒名位雖未云  
究乃克謹守家法以詒後人至公為七世於戲盛哉  
使文正忠宣家法永存雖百世益昌也也繼二公者  
烏知不在公乎淳熙元年三月戊子朔譚惟寅敬書  
文正忠宣繼世之美人知起敬今觀柱國唐誥已有  
聞於四世之上諸公又推之載初相系家世久遠可  
謂莫之與京忠宣至春官常伯亦四世正爾鼎貴蓋  
未易量也高士廉志氏族以崔氏居第一特以其久  
故也矧名德相望者耶嘉定丙子季春六日眉山任  
希夷敬書

雲津范秘書以先太師文正魏國公五世祖知  
良鄉縣主簿上柱國唐誥見示索詩為賦

古吳西樓湯仲友頌首

麗水勾稽兼柱國大唐官制未及詳誥詞歷：多稱  
美史傳寥：孰補亾萬里山河從換主一門德澤自  
流芳地靈會見生人傑不特斯文五世昌 已卯九  
月望日書

制詞最為近古秦漢以來廢之至唐而復舉焉茲一  
權良鄉縣主簿而諄切以命之臣下其有不激勵者  
乎抑勲官創於戰國至唐乃為虛名然必加於有勞



者宜主簿之後嗣永昌也至順三年夏五月宛平曹  
鑑跋

高昌僕玉立拜觀

石曼卿詩

古松

石延年

直氣森：恥屈盤鐵衣生澁紫鱗乾影搖千尺龍蛇  
動聲撼半天風雨寒蒼蘚靜綠離石上綠蘿高附入  
雲端報言帝室掄材者便作明堂一柱看

曼卿上世家幽州燕俗勁武少以氣自豪書體兼顏

柳前輩謂愈大愈奇余三見真蹟禮部尤尚書家西  
帥詩有旗光秋曉起甲色大江橫之句歐陽氏籌筆驛  
詩有意中流水遠愁外舊山青之句今又見此詩影  
搖千尺聲撼半天尤為膾炙皆警策也歐陽文忠稱  
文章勁健稱其意氣余以謂字畫猶有劍拔弩張之  
勢吾鄉郡從事官舍中先有籌筆驛詩石刻久矣今  
趙君致遠又欲刻此是為二妙也四明樓鑰

節度推官廳事舊有籌筆驛詩刻流轉入郡圃中師  
夏請于使君得復舊貫暇日過袁君木叔家見古松  
詩筆其嚴密勁健尤為卓絕因摹刊之以為籌筆驛

詩刻之對舅卿翰墨不多見於世藐然從事之廬破  
屋數間雖不足以避風雨而二刻屹立其中未可以  
為陋也又得文昌樓公為之題識益光榮矣木叔之  
先君子好奇嗜古所蓄前輩遺墨甚衆此其一耳慶  
元己未上元日古汴趙師夏書

士大夫豪宕奇崛者為文必峭拔清美間放者有句  
必高妙故梅詩之疎影橫斜和靖如圖寫此花松詩  
云半天風雨曼卿獨贈炙人口也自昔論詩者嘗為  
寫情非難狀物最難過於體倣或失之俗畧於比喻  
又失之泛必渾然天成它物不足以當之斯為美爾

曼卿平生之氣卓犖多慕古人奇節偉行其見於辭  
章之末又肯為兒女子軟媚語耶梅聖俞以雲影濤  
聲之句過此作非矣節推趙公得真蹟於表正肅之  
仲弟木叔而刻之石二百年來陵移谷遷何物不為  
塵土之歸而此刻至今存焉半雲翁亦在篋藏故物  
之列家既析異又幸心可得而寶之造物者若有私  
焉嗚呼故家遺物歷年之久而卒獲所歸有如此帖  
者乎敬書此以識余感歲在玄默敦牂五月望北山  
老樵黃慘書

叔茂

宋韓魏公二帖

琦再拜啓琦有小懇容易干聒台聽琦向者自并易  
相事簡公暇因闢後圃起一堂名曰畫錦蓋取古人  
榮守本邦之義時杜正獻公以降往：有詩以光貴  
之已而被召歸闕常欲求公文百十字以記之為勸  
中不朽之事拜接幾十年卒畜縮不敢措一語今守  
相趙元甫知琦欲有求於公遂能用心獲一美石磨  
礮已就且有書見督云早丐公文至則便可鐫立琦  
以此不自量度輒以誠請公若憐而許之不獨夸耀  
閭里誠獲託公文遂為無窮之傳矣如曰未可幸恕

妄作皇恐皇恐謹奉手啟上聞不宣琦再拜啟

琦再拜啟信宿不奉儀色恭惟興寢百順琦前者輒以畫錦堂記容易上干退而自謂眇末之事不當仰煩大筆方夙夜愧悔若無所處而公遽以記文為示雄辭濬發譬夫江河之決奔騰放肆勢不可禦從而視者徒聳駭奪魄烏能測其淺深哉但褒假太過非愚不肖之所勝遂傳布之大恐為

之玷此又捧

讀慙懼而不能自安也其在感著未易言悉謹奉手

啟叙謝不宣琦再拜啟參政侍郎

台坐

張敬夫嘗言平生所見王荊公書皆如大忙中寫不

知公安得有如許忙事此雖戲言然實切中其病今  
觀此卷因省平日得見韓公書蹟雖與親戚卑幼亦  
皆端嚴謹重畧與此同未嘗一筆作行草勢蓋在胸  
中安靜詳密從容和豫故無頃刻忙時亦無纖芥忙  
意與荆公之躁擾急迫正相反也書札細事而於人  
德性其相関有如此者熹於是竊有警焉因識其語  
於左方慶元丁巳十月庚辰朱熹

宋人九帖

彥博頓首祠部同年近累得來翰深荷勤意審美轉

伏惟歡會未涯披對春中萬：愛重彥博頓首

靜萬已至且令模書必應過夏

脩啟近賈常行曾致拙問辱書承經暑動履清和少  
慰瞻勤兼蒙惠以韓城鼎銘及博山盤記不意頓得  
二奇物脩集錄前古遺跡自三代以來徃：有之獨  
無前漢時字故常以為恨今遽獲斯文遂大償素願  
乃萬金之賜也屢患膝瘡家居絕客數日把翫無厭  
然古文難識當徐訪學古博識之士問之期於盡得  
而後已不勝珍重珍重謹於郵中奉狀粗報已獲佳  
貺餘未及他不宣脩頓首啟原甫安甫學士坐前五



月廿二日謹狀

軾謹次傳道先生游廬山高韻

塵容已似服轅駒野性猶同縱壑魚出入岩巒千仞  
表較量筋力十年初雖窈窕驅前幸有鷗夷掛  
後車莫笑吟詩談生活當今阿買爲收書

閱訖幸即付去人送公弼郎中禹功太傅明叔教  
授各乞一首軾上

轍謹賦喜雪一首奉權府運使司封郎中一笑  
發函寬大一封書卧閣雍容三日餘旋見雪花投  
落未應天意與人踈瓦乾浙：知鳴霰畦潤漸：想

沒鋤高會梁園遺跡在早知詞賦似相如

再用書字韻賦喜雪一首

春秋無麥似當書况復秋田水潦餘一雪專來救焦  
槁千箱乞與等親踈消殘溫癘曾非藥蝕遍陳根不  
用鋤猶恐遠村沾未足更呼農圃問何如

轍上

舜民再啟姻期必嘗經度舜民以初二日次洛中自  
爾至初六日良吉又以一行兵冗不能久留欲於初  
六將財定併行并以是日納婚留 在門下翌日遂  
行未審可否餘謹面質舜民頓首

庭堅頓首伏承遠歸道涂之勤未得休息而躬料湯

藥至輟寢膳竊惟起居不遑幸有安平之候想遂釋  
然矣時雨沾足春風妍暖想同家母萬福民有食麥  
之慶令嗣長官亦得申眉矣亟作此狀候服藥者安  
問極不周至續亦別通啟左右矣虔堅再拜

栻頃在湘中嘗約刑部劉公脩斜川故事城南  
有丘巋然因以南阜名之是歲來守桂林負此  
約三年矣戊戌五月與周允叔吳德夫宇文正  
父傳父登雪觀和五柳翁韻謹書以寄劉公栻  
再拜

行客念故里勞者思少休如何歲華新當爾天南游

涉五遇佳日品題自名流聊復措病眼沙邊玩輕鷗  
和風著冠中春意動林丘眇懷千載人孤高諒能儔  
亦有一二士舉酒相勸酌未知吾故國草木如此否  
政拙堪下考智短忘百憂賜歸倘蒙幸舊盟良可求  
敬夫寄斜川詩叙往年之約殊不知芮今病已  
矣非如昔時猶心不忘耳勉和一章以叙謝意

芮再拜

病著不任事淹卧心自休經時不出門况復斜川游  
每覲節物換况驚時序流少年喜追逐聚散水上鷗  
沉舟枯木伴風帆春樹立我病正尔許懷念老朋儔

有酒不能飲徒有獻與酌故人酌佳日亦復我念否  
佳章寫懷抱一讀寬百憂吾君念遠民歸計未易求  
戊戌三月乙丑順寧閣

蔡端明一帖

襄啟前蒙惠書伏審尊候萬福口口口入京都即休  
政此士君子所以自處始終也甚善甚善公綽數日  
前見訪口齊道話終夕近日保養之口頗見門戶然  
且能自保消之口口久當得力州下更肅靜如前  
時可自遣也舟船必恐無用目下口闕遣人勾還謹

奉手狀問起居不宣襄上 賓客七兄足下正月廿五日

林和靖二帖

逋奉白秋深體履清適大師去後曾得信未院中諸事如常否今送到菱角容易容易謹此馳致不宣逋小簡上廿二日 瑤兄座主

暫倩一人引此僕去章八郎家

逋奉簡三君數日前曾勞下訪屬以多故未果致謝感愧感愧榜名必已見了彼珍重者果為兩手所指

矣呵：如因暇時許相過否馳此不宣從表林逋頓  
首四月十七日

所托買物錢二索省是前人留下尚恐未足餘向  
面致多感多感

此和靖真蹟聶衛公帥蜀時所得也觀其筆勢遒勁  
無一點塵俗氣與暗香疎影之句標致不殊此老胸  
中深有得梅之清故其發之文墨者類如此當襲藏  
之以為珍玩元統甲戌夏五謝升孫書於南窗

子順

我愛翁書得瘦硬雲腴濯盡西湖淥西臺少肉是真  
評數行清瑩含冰玉宛然風節溢其間此字此翁俱

絕俗開緘見字即見翁五百年來如轉燭可憐人物  
兩相求落我掌中珠有足水邊孤墳我曾拜土冷烟  
荒骨難肉當時州吏歲勞問於今祀典誰登錄翁固  
不能知我悲聊對湖山歌楚曲我歌湖山亦不知惟  
有春鳩叫深竹歸來把酒弔雙緘猶勝無錢對黃菊

沈周用坡翁韻

西湖處士林君復結廬倒臥湖波淥百年何物傷汝  
廉山下梅花總寒玉滿城屋瓦鱗：然未信誰人能  
脫俗 陌嬉春拾翠鈿歌鐘入夜燒紅燭獨教老鶴  
閑應門走傍湖陰濯雙足高平范公遣使來寄以新



篇勝餽肉風節文章厚且淳兩句平生成實錄才多  
墨妙更入神唯許唐翁和高曲果然遺墨似其人如  
倚清風捫瘦竹惜哉甫里陸天隨不趁斯人書杞菊

吳寬

湖亭路繞梅花曲石硯年：洗芳淥湖光照眼花絕  
塵此老當年面如玉誰應獨步難同調字豈必工終  
不俗城東蒼頭持卷來一夜起看三秉燭我從書法  
得相法骨瘦神清矐亦足有如辛苦學仙人火冷空  
山斲葷肉遺編舊事已陳跡五百年來登鬼錄水流  
花落兩無情誰能更和西湖曲石田詩人亦清士居

不種梅翻種竹他時併作隱君論何似周蓮與陶菊  
李東陽

我昔孤山訪遺躅春暖西湖泛晴淥山頭草樹不荒  
涼知是先生此埋玉念初茅廬結構完長吏頻顧驚  
流俗就中薛李最忘形湖上夜歸曾秉燭先生自樂  
味道腴此懷何嘗忘不足惟耽吟詠苦憂吟役擾心  
兵削肌肉詩成又復恐驚世輒毀不使相騰錄誰知  
造物難盡藏千古騷壇傳妙曲亦有遺墨落人間留  
在剡藤并楚竹見其瘦硬想其人似對靈均食落菊

陳頴



不控極翻想竹色時所伴隨石粉向似成遠對樹前

李東陽

我昔孤山訪遺躅春暖正極之晴深山頭草樹不荒

謀知是先生結構完長更須細覽

流俗就中薛苦愛伊投撥心

味道暇此涼不使相贈錄詞知

兵削取肉詩有遺墨落人湖窗

造物難盡藏似對靈均食落處

在荆蔕并楚

陳頤







壹玖伍陸年 肆月 念 柒日



浙江圖書館善本

甲登記號：030434

一九 年 月 日





Blue Cyan Green Yellow Red Magenta White 3/Color Black



TIFFEN Color Control Patches

© The Tiffen Company, 2007

Centimetres

1 2 3 4 5 6 7 8 9 10 11 12 13 14 15 16 17 18 19  
1 2 3 4 5 6 7 8





**TIFFEN** Color Control Patches

© The Tiffen Company, 2007

Blue    Cyan    Green    Yellow    Red    Magenta    White    3/Color    Black